

c'est que tu n'as plus de droit en ta maison : Pourquoi cela ? luy demanda Xanthus : Pource, repartit Esope, qu'hier estant yvre, tu demuras d'accord de boire la Mer, & laissas ta bague pour gage. Quoy ? répondit Xanthus, pourray-je bien faire quelque chose, qui soit plus grande, & plus à estimer que la foy ? Nenny certes : C'est pourquoy j'ay à te prier, que pour me tirer de cet embarras, en me faisant gagner la gaguere, ou en rompre le pacte, tu veuilles employer pour moy tout ce que tu as de connoissance, d'adresse, & d'experience. Pour t'en parler franchement, dit Esope, l'on scait assez que tu t'es offert à une chose, de laquelle il t'est impossible de venir à bout, mais j'ose bien me vanter d'en faire annuler les conditions. Quand vous serez donc tous assemblez aujourd'huy, garde-toy bien de temoigner à ta mine aucune marque de crainte : mais di hardiment à jeun, ce dequoy tu es demeuré d'accord estant saoul. Apres cela mets ordre, qu'il y ait quantité de paille sur le rivage, & une table dressée expres, avec des garçons qui se tiennent prests, pour te verser à boire l'eau de la Mer. Alors quand tu verras tout le peuple assemble à ce spectacle, apres que tu seras assis, commande que l'on te remplisse une tasse d'eau : Puis l'ayant prise, demande à celuy qui a les gages ; quelles sont vos conventions ? & le demande tout haut afin qu'il n'y ait personne en la compagnie qui ne l'entende. Que s'il advient qu'il te reponde que tu es demeure d'accord de boire toute l'eau de la Mer : t'adressant alors au Peuple : Hommes Samiens, diras-tu, il n'est pas que vous ne scachiez bien que les Fleuves se vont rendre dans la Mer ; or est-il qu'il à este accorde entre nous, que je boirais la Mer seule, & non les Rivieres qui entrent dedans. Que cet Escolier donc empeche premierement que les eaux des Fleuves ne se mélent à celles de la Mer, & quand il l'aura fait, je la boiray. Ce conseil fut d'autant plus agreable à Xanthus, qu'il se promit parement que par ce moyen la convention seroit rompue. Apres donc que tout le Peuple se fut assemble au rivage de la Mer, pour voir l'issue de cette entreprise & que Xanthus eust dit & executé de point en point ce qu'Esope luy avoit enseigné, le Peuple s'en etonna, & le loua grandement. Ainsi l'Escolier se confessa vaincu, & se jettant aux pieds de son Maistre, le pria que la gageure demeurast nulle : ce que Xanthus luy accorda tres-volontiers, à la requeste du Peuple.

Comme ils furent de retour au logis, Esope s'adressant à son Maistre, Seigneur, luy dit-il, n'ay-je pas bien merité d'Estre affranchy, pour les fideles services que t'ay rendu toute ma vie ? Quoy ? répondit Xanthus, en le tancant aigrement, ne veux-je pas t'affranchir aussi ? Va-t'en à la porte, & prend bien garde si tu ne verras